

ARLEF: BANT DI 35.000 EUROS PE FIESTE DE PATRIE DAL FRIÛL

I fonts a son dedicâts ai ents locâi. La scjadince des domandis e je fissade pai 20 di Fevrâr dal 2019

La ARLeF (Agjenzie Regionâl pe Lenghe Furlane), in atuazion des normis de L.R. n. 6 dai 27 di Març dal 2015, inte suaze dal Program anuâl fat bon di pôc de Zonte regionâl, e sosten la **realizazion di manifestazions culturâls pe celebrazion de “Fieste de Patrie dal Friûl” (ai 3 di Avrîl dal 2019)** di bande di ents locâi in colaborazion cu lis Pro Loco e altris sogjets publics e privâts cence fins di vuadagn o a fins mutualistics, **metint a disposizion un totâl di 35.000 euros.**

A puedin acedi al contribût ducj i ents locâi che a àn la lôr sede legal intun dai comuns cjapâts dentri intai teritoris furlanofons “storics” des ex provinciis di Gurize, Pordenon e Udin.



Si puedin finanziâ attivitàs culturâls finalizadis ae celebrazion de “Fieste de Patrie dal Friûl” che a pontin a ricuardâ e a valorizâ lis origjins, la culture e la storie di autonomie dal popul furlan; iniziativis par fâ cognossi e/o par aprofondî la lenghe, la storie e la culture furlane, cu la partecipazion soredui dai zovins; iniziativis indreçadis a pandi la cognossince e l'ûs dai diviers struments linguistic informatics esistents, tant che il Grant Dizionario Bilengâl talian-furlan o il Coretôr Ortografic Furlan; iniziativis che a pontin a fâ cognossi la leterature e la editorie in lenghe furlane; rapresentazions teatrâls e concerts musicâi di cualitât, in lenghe furlane; acuist e difusion di bandieris dal Friûl. Dai 35.000 euros a disposizion, 5.000 euros a son destinâts aes iniziativis culturâls proponudis dai Comuns di Udin e Pordenon, 27.500 euros a son destinâts aes iniziativis culturâls proponudis di altris ents locâi, altris 2.500 euros a son destinâts aes iniziativis culturâls proponudis di agregazions di ents locâi. **Lis attivitàs culturâls lis puedin davuelzi, dai 18 di Març ai 14 di Avrîl dal 2019**, sedi un ent locâl singul che une agregazions di ents.

Il bant, il regolament e i modui pes domandis si puedin discjamâ dal sit de Agjenzie, sezion Bants garis avîs 2019 (www.arlef.it/bants-garis-avis/2019).

Lis domandis a varan di rivâ, **dentri dal tiermin perentori dai 20 di Fevrâr dal 2019**, dome midiant di spedizion vie PEC ae direzion: arlef@certgov.fvg.it. Par nissune motivazion a saran cjapadis in considerazion domandis che a vessin di rivâ di là dal tiermin fissât o cun altris modalitâts. Par dutis lis informazions sul bant, si pues telefonâ al 0432 555910, o scrivi a: federica.delpino@regione.fvg.it